



INATSISARTUT

## Aningaasaqarnermut Akileraartarnermullu Naalakkersuisoq

Ulloq: 30. august 2024  
J.nr.: 01.31.06/24-01092

**Aningaasaqarnermut Akileraartarnermullu Ataatsimiititaliap tallimangornermi ulloq 23. august 2024-mi aalajangiineranik Naalakkersuisunut ilisimatitsineq.**

**Qatserisuni ineqarnermut akiliutit naatsorsoqqinnissaannut Illuut A/S-imut pisortanit taarsigassarsititsineq pillugu apeqqutit. Ataatsimiititaliap suliaa nr. 01.31.06/24-01092. Udvalgets sag nr. 01.31.06/24-01092.**

”Naalakkersuisut **inassutigaat,**

- kontomi pingaarnermi 20.11.70 Suliniutinut nutaanut sillimmatit 3.000.000 kr.-nik ilanngarneqassasut
- kontumi pingaarnermi 34.01.07 Qatserisunut taarsigassarsiat (tapiliussatut aningaa-saliissutit), 3.000.000 kr.-nik ilaneqassasut
- konto pingaarnermi 34.01.07 Qatserisunut taarsigassarsianut ilanngussaq 7 malillu-gu oqaasertaliussamik ilanngussisoqassaaq
- Peqqissutsimut Naalakkersuisoq isummernissamut tunngavissiami matumani tassungalu atasuni ilanngussani teknikikkut imarisaatigullu allannguissamut piginnaatinneqassasoq.”

## Aningaasaqarnermut Akileraartarnermullu Ataatsimiititaliap oqaaseqaatai apeqqu-taalu

Ataatsimiititaliap suliamut kingullermik apeqqutaanut Naalakkersuisut 23. august 2024-mi akissutaat ataatsimiititaliamit qujassutigineqarpoq.

Peqqinnissaqarfik ajornartuulissanngippat Peqqinnissaq pillugu Ataatsimiititaliarsuup kaammattuutai amerlasuut naalakkersuinikkut sukkasuumik iliuuseqarfiusariaqartut Peqqinnissaq pillugu Ataatsimiititaliarsuaq isumaliutissiisummini 2023-mi majimeersumi allappoq. Tamanna sulisussarsiortarnermut sulisunillu attassiinnarniarnermut apeqqummut immikkut tunngavoq.

*“Misissuinerit peqqissutsikkullu sullissisunik oqaloqateqarnerit ersersippaat sulisunik atorfinitsiniarnermut atorfeqartuartsiniarnermullu ajornartorsiut pingaaruteqartoq tassaasoq inissiat/inissiat pitsaassusaat. Ineqarnermik susassaqarfik imaannaanngitsuullunilu soqutigisarpassuarnit sunnersimaneqartarpoq. Taamaattumik ataatsimii-taliarsuup immikkoortut arlallit suliniuteqarfusinnaasut saqqummiussimavai. Ineqar-neq peqqinnissaqarfimmi sulisitsisup akisussaaffigigaa qularutissaanngilaq, tamannalu qaqutigulaarpoq. Tamatuma saniatigut ineqarnikkut atugarineqartut nalerisimaan-*

*nginnermut aallaaviusarput. Ineqarnermut apeqqut taamaallaat Peqqinnissaqarfimmut tunngasuunngikkaluartoq inissiat pitsaassusiisa pitsaanerulersinneratigut Kalaallit Nunaanni suliffimmik ujartuinissaq pilerinarnerulissallunilu atorfeqareersut atorfeqartuartinnissaat ajornannginnerulissaaq. Kisianni Nuummi nunattalu sinnerani inissaaleqinerit assigiinngitsorujussuupput. Nuummi inissiat pitsaassusaat amerlassusaallu annertuumik ajornartorsiutaapput. Nunap sinnerani inissiat pitsaassusaat ajornartorsiutigineqarneruvoq. Peqqinnissaqarfup "nammineq" inissiaatinut immikkut innersuussisinnaanera sulisunik atorfinitsitsiniarnermi sakkuuvoq pingaarutilerujussuaq aalajangiusingimaneqartariaqartoq. Taamaalilluni peqqinnissaqarfik isumaqarpoq Namminersorlutik Oqartussat inissiaataannut tamarmiusunut ilaanissaq tulluurtuunngitsoq. Nuummi peqqinnissaqarfup inissiat innersuussinnaasaasa amerlanersaat Dronning Ingridip Napparsimmavissuata qanittuaraaniittariaqarnerat immikkut atuuppoq."*

Taamaalillunilu nunatsinni peqqinnissaqarfimmi unammilligassat anginerpaat ataavartullu marluk sulisussarsiortarnermut sulisunillu attassiinnarniarnermut tunngasuunerannik Naalakkersuisut nalunaaruteqarnerat ataatsimiititaliamit ilumoornerarneqassaaq. Suliassa-qarfinni taakkunani marluusuni ajornartorsiutit peqqinnissaqarfup ingerlasinnaaneranut annertuumik kinguneqartarput. Peqqinnissaqarfik pitsaanagerusumik ingerlassappat ilaatigut aalajangiisuulluinnarpoq sulisussarsiortarnerup sulisunillu attassiinnarniarnerup pitsaanerulernissaat.

Naalakkersuisut suliamut tunngatillugu namminnek oqaatigaat ineriartorneq tamanna isumakulunnartoq aammalu Qatserisuni ajornartorsiutaalersimasut aaqqiivigineqanngippata tamanna aalajangersimasumik sulisunut, napparsimasunut aammalu peqqinnissaqarfup aningaasaqarneranut pitsaanngitsumik kinguneqassasoq.

Siunersuinissamut aggeqqusissummini ataatsimiititaliap oqaatigaa ineqarnermut akiliutit sulisunut pisariaqartinneqarluinnartunut qunullertitsisuusariaqanngitsut, soorlutaaq ataatsimiititaliamit pingaartinneqartoq sulisut isertitakinnerit sulisorisanut inissianik aamma atuisinnaasariaqartut.

3 mio. kr.-inik taarsigassarsisitsinissamik siunnersuuteqarneq ataatsimiititaliap naliliinera isumaalu malillugu ineqarnermut akiliutinik annikitsuararsuarmik apparsaataassaaq. Ineriartornerup isumakulunnartup kiisalu aalajangersimasumik sulisunut, napparsimasunut peqqinnissaqarfip aningaasaqarneranut kingunerluutaasut iluaqusernissaannut ineqarnermut akiliutit appartinneqarnerat naammangitsoq ataatsimiititaliap isumaqarpoq. Sulisunik pisariaqartinneqarluinnartunik sulisussarsiortarnermut atatillugu ineqarnermut akiliutit qunullertitsinnaanerannik ajornartorsiummut kiisalu sulisorisat isertitakitsut sulisorisanut inissianik atuisinnaanerannut iluaqusiissutissatut aningaasat naammangillat.

Pappiliani aalajangiinissamut tunngavissatut Naalakkersuisunit ataatsimiititaliamut nassiunneqartuni allassimavoq ineqarnermut akiliutissatut Naalakkersuisut isummernissamut tunngavissiaanni 2023-mi februarip qaammataani nalunaarutigineqartup aammalu isummer-

nissamut tunngavissiami kingullertut tiguneqartumi nalunaarutigineqartup akornanni nikingassummut tunngavilersuutaavoq Illuut A/S-ip kukkusumik naatsorsuisimanagera. Nikingassummut pissutaavoq inissiamut ataatsimut init ataatsimoorussat 10 m<sup>2</sup>-erit misaanniittut inissiat katillugit kvadratmeteriannut ilanngullugit kisinneqarsimanagerat. Kukuneq ineqarnermut akiliutissat tamanna inissianut ineqarnermut akiliutissatut nalunaarutigeqqaarneqartumit annertunerujussuunerannik kinguneqartoq Naalakkersuisut paasissutissiipput. Naatsorsuinerlunneq suliami paasissutissiissutigineqartoq assorsuaq isornartutut, pitsaanngitsutut kiisalu akuerineqarsinnaanngitsutut ataatsimiititaliamit isigineqarpoq.

Siuliani oqaatigineqartutut taamatut ineriartortoqarnera ernumanartuq aammalu Qatserisuni ajornartorsiutaalersut aaqqiivigineqanngippata aalajangersimasumik sulisunut, napparsimasunut aammalu peqqinnissaqarfiup aningaasaqarneranut pitsaanngitsumik kinguneqassasoq Naalakkersuisut suliami namminneq paasissutissiissutigaat.

Ataatsimiititaliamittaaq oqaatigineqarpoq “napasulianik pingasunik” pisinissami tunngaviit ilaat ataaseq Naalakkersuisunit oqaatigineqartoq unaammat:

*”inissianut nutaanut periarfissaqarnissaq sulisussarsiornermut taakkunatigullu aqutsinermut aningaasartuutitut pitsaasumik sunniuteqarnissaa naatsorsuutigineqartoq, tassa piffissami sivikitsumik atorfinitsitsisarnerit sivilunerusut amerlanerunissaat, nikittaannissamut isumaqatigiissutit aalajangersimasumillu atorfinitsitsisarnerit amerlanerulernissaat naatsorsuutigineqarmat.”*

Taamaattumik aningaasaliinernut annertuunut ilaatigut suliami matumani Naalakkersuisunit pisariaqartutut isigineqartunut atatillugu missingersuutit inissisimanagerannik naatsorsuisarneq pillugu inatsimmi aalajangersagaq qanoq atorineqarsinnaanersoq akissuteqarfigineqassasoq ataatsimiititaliap allakkani 5. august 2024-meersuni kissaatigaa.

Inuiaqatigiit aningaasaqarnerannut kingunerisassanik naliliineq taamaattoq suliarineqarsimanngitsoq Naalakkersuisut paasissutissiissutigaat. Taassuma suliarineqarnissaanut atatilugu Naalakkersuisut paasissutissiissutigaat aningaasaliissuteqarnermi inuiaqatigiit aningaasaqarnerannut pissarsissutissat tigussaasut sorpiaanersut uppersarsarneqassasoq. Naatsumik oqaatigalugu Naalakkersuisut paasissutissiipput aningaasaliineq BNP-mit anginerunngikkuni aamma/imaluunniit Nunatta Karsiata isertitaqarnerunerannik kinguneqassasoq. Tamanna taamatut kinguneqassanersoq Naalakkersuisunit imaaliallaannarlugu nalilerneqarsinnaanngilaq, Naalakkersuisummi takusinnaanngilaat periuseq sorleq taama inerineqarsinnaanersoq.

Taamaattumillu inuiaqatigiit aningaasaqarnerannut kingunerisassanik Naalakkersuisut naliliisimannginnerat ataatsimiititaliamit eqqumiigineqarpoq.

Ukiut 18-it ingerlaneranni tapiissutitut aningaasaliissutit 54 mio. kr.-inik amerlineqarnerat Naalakkersuisut isumaat malillugu BNP-mik qaffariartitsissanngitsoq ataatsimiititaliamit eqqumiigineqarpoq. Sulisussarsiornermut taakkuninngalu aqutsinermut aningaasartuutitut pitsaasumik kingunerisassatut naatsorsuutigineqartut Naalakkersuisunit pingaartinneqarunnaarnerat ataatsimiititaliamit aamma eqqumiigineqarpoq.

Suliap imaannaannginnera innersuussutigalugu ineqarnermut akiliutit qaffasinnerat pillugu ajornartorsiummut aaqqiissutissamik allamik nassaarniaqqullugit Naalakkersuisut ataatsimiititaliamit kaammattorneqassapput.

**Aningaasaqarnermut ataatsimiititaliap aalajangiinera**

Siuliani allassimasunik oqaaseqaateqarluni Naalakkersuisut inassuteqaataat **ataatsimiititaliamit akuerineqanngillat.**

Inussiarnersumik inuulluaqqusillunga



Aii Chemnitz Narup

Aningaasaqarnermut Akileraartarnermullu Ataatsimiititaliap siulittaasua